

Ex miembro di Parlamento, Digna Lacle-Herrera

Fanatismo y degeneracion moral

ORANJESTAD - For di ex-miembro di Parlamento, Digna Lacle-Herrera, nos a ricibi un comunicado di prensa, caminda e ta haci su disertacion riba “fanatismo y degeneracion moral”, e ta bisa textualmente asina:

Kiko fanatismo y degeneracion moral lo por tin di haci cu otro?

E contesta ta: mas di locual nos por imahina!

Pa cuminza, e pregunta: kiko ta fanatismo? Fanatismo ta e exceso o e exageracion den nos admiracion pa un ke otro, e ta tambe e incapacidad pa actua cu moderacion y di por huzga e límite di nos aprecio o di nos simpatía, e falta di “self control”.

Den mayoría di e casonan nos ta papia di fanatismo den sentido negativo, principalmente ora cu ta trata di religion o di política, ya cu e consecuencia ta desastroso, un fanatismo enfermizo! Bo por ta un fanático di un of otro deporte o di un deportista, fanático di un clase di música o di un cantante, di teatro o di un actor, enfin fanático di tur e actividadnan bunita cu ta yena y alegrá nos bida. Aki nos por papia di un fanatismo sano. Pero di ora cu nos fanatismo ta haci nos bira ciego y sordo pa un realidad indigno y reprochable e consecuencia ta funesto pa nos mes y

pa nos comunidad.

Cuanto dolor, tristeza y inhusticia e intolerancia y e discriminacion causá pa e fanatismo den religion no a causa y ta causando ainda? Pueblonan completo a wordu kitá for di mapa durante di gueranan impulsa pa e fanatismo cu a transforma su mes den un odio implacable. Nos ta bon na haltura di e gueranan den siglonan pasá, caminda den “ nomber di Señor ” a sembra destruccion.

E fanatismo a hunga un papel tristo y bergonzoso cu tin su repercusion te cu e dia djawe. Un ehempel tristo ta e pogromnan cu a tuma lugar na Rusia. E guerra entre Irlanda Protestant y Irlanda Católico tambe ta un ehempel di fanatismo y di intolerancia, e guerra na Irak entre e shiitnan y e sunitnan, tur dia ta exigí bida di hendenan inocente, na Afganistan e Talibannan, e organisacion

Al Qaeda tur ta ehempelnan caminda e dirigentenan cu mente diabólico ta malusá e fanatismo pa recrutá e teroristanan, pa sembra morto, tristeza y angustia na tur parti di mundo. Y tur e desastrenan aki tin nan origen den un fanatismo enfermizo.

Bo ta puntra con por ta posibel cu un hende por laga su fanatismo dirigí su

bida, su pensamiento. Y aki nos ta yega na e punto caminda nos ta mira con e influencia di un fanatismo destructor ta dominá tur loke nos por yama moral. E distincion cu nos conocé entre bon y malo aki ta locual ta dirigí nos bida, pa nos por funcioná como un miembro ehemplar den un comunidad, caminda reglanan di respet mutuo ta haci posibel cu nos por papia di un estado di derecho, cu su norma y balornan pa garantizá paz y seguridad pa cada individuo. Si nos ta permití cu den un estado di derecho, pa fanatismo ciego, e respet pa norma y balornan ta bay perdi, nos ta habri caminda pa un of otro sistema totalitario. E fanatismo ey, cual por lo general ta di caracter politico ta lo cual ta sostené gobernantenan oportunista na poder, un poder cu nan ta usa pa nan propio interes, usando un of otro “issue” pa sigurá e sosten di e masa. Na Cuba p.e. e palabra “revolucion” ta e palabra magico cu a alimentá un fanatismo cu a ciega e pueblo completamente.

E pueblo, den su euforia pa e triunfo di e revolucion, ni sikiera a nota cu poco poco el a wordo lastrá den un sistema, un ideología pa cual nan no a lucha ni a sacrifica nan yuinan. Na momento cu esnan cu a descubri cual tabata e rumbo

cu e pais tabata bay a lanza nan protesta y a oponé nan mes, nan a wordo likidá den nomber di e “ revolucion ”! Y aki e pueblo a perde lo mas precioso di un individuo, su libertad!

Tin un dicho cu ta bisa cu un pueblo ta haya e gobierno cu e merece, pero hamas nos por kere cu un pueblo por scoge pa su propio destruccion. Pero gobernantenan di mala fe si por manipulá cu mentira y triki e pueblo inocente cual ta bira víctima di e fanatismo ciego cu ta pone perde tur sentido di realidad. Den nos comunidad tambe nos por nota un tristeza y preocupacion cu e rumbo cu nos pais ta cogiendo ta uno cu sigur e pueblo no a pidi pe.

Nenga di repudia y condena y hasta nan ta sali na defensa di actonan bochornoso, actonan contra ética y moral, abuso di poder y violacion di nos leynan y nos derechonan fundamental ta un señal hopi grave di un decadencia moral, cual tin su origen den un fanatismo cu ta destruyendo tur locual nos antepasadonan a lucha pe. Un patrimonio riba caminda di progreso, un pueblo noble, respetuoso y cordial di cual nos tabata asina orguyoso. “ One happy island “? Aruba, quo vadis?!